

Date – 23/07/2025

Time - 7:30 Hrs

HEADLINES (MORNING)

1. MLA Pu Lalrintluanga Sailo ruang chu nizan khan an chenna in Luangmualah lumenpui a ni a, vawiin hian Luangmual Presbyterian Kohhran Centenary Hall ah vui a ni ang.
2. Mizoram EMRS Governing Council thutkhawm hmasa ber chu an chairman Chief Minister Pu Lalduhoma hovin neih a ni.
3. Bihar-a Special Intensive Revision (SIR) neih mekah voter vaibelchhe sarih leh nuai 68 chuang tuam chhuah tawh an nih thu Election Commission chuan a sawi..
4. Prime Minister Narendra Modia chuan UK leh Maldives tlawh turin vawiinah a zinchhuak dawn.

<><><>

MLA LALRINTLUANGA SAILO DIED

Mizoram Legislative Assembly member, Pu Lalrintluanga Sailo ruang chu nizan khan an chenna in Luangmualah lumenpui a ni a, vawiin hian Luangmual Presbyterian Kohhran Centenary Hall ah vui a ni ang.

MNF Party chuan an party banpui rinawm a tliak a ni an ti a, Pu Lalrintluanga Sailo chanchin an tarlan danin, kum 1976 khan, kum 16 chauh niin 'Pathian leh kan Ram tan' tiin, India lak atanga zalenna sualtu MNF zawmin hnam sipaiah a tang a. A tawp thlenga awmin remna ziah khan a lo haw a, 2nd lieutenant a kai hman a. Overground politics-ah MNF tan thahnem ngai taka thawkin nihna hrang hrang a chelh chho a, tunah hian National Core Committee Member a ni mek a ni.

Bible nema kum 16 mi lek a nih laia ram leh hnam tana a thisen far tawp thlenga inhlam Pu Lalrintluanga Sailo chu a intiam ang ngeiin a thih ni thlengin ram leh hnam tan a nung tih an thuchhuahah chuan an sawi a, Pu Lalrintluanga Sailo hi kum 2018 inthlanpuiah khan MNF Party ticket-in Dampa bialah MLA atan hneh taka thlan tlin a ni a. Kum 2023 khan he bial atang bawh hian hneh takin thlan tlin nawn leh a ni.

MNF Senior Vice President Dr. R. Lalthangliana chuan MLA Pu Lalrintluanga Sailo chu MNF Party tana mi tangkai anih thu sawiin a hmunruak luah khah a har hle dawn a ti a, party ang pawha an ui takzet thu leh ram pum huap pawha mi uiawm tak a nih thu a sawi.

Pu Lalrintluanga Sailo hi Larsap Gen (Rtd) Vijay Kumar Singh leh Chief Minister Lalduhoma bakah party hrang hrangin an ui thu an sawi a.

Larsap chuan Pu Lalrintluanga Sailo chhungte a tawrhpuithu a sawi a, Mizoram tana a hnathawh te an hriatreng tawh tur thu leh Mizoram in a hre reng tawh dawn a ni a tii.

Chief Minister Pu Lalduhoma chuan Pu Lalrintluanga Sailo chu an ui takzet tih sawiin Legislator tha leh taima, thusawi thiam leh debater ropui an chan chu pawithu a sawi a, Sawrkar pawhin a tih tur apiang ati zel dawn tih a sawi.

ZPM Party President Pu Lalliansawta chuan MLA Pu Lalrintluanga Sailo thihna chuan a thawn thu sawiin mi tawng hman thiam leh Assembly session tih ngaihnawmtu a nih thu a sawi a, an party chuan an ui hle a ni a ti.

Mizoram Pradesh Congress Committee (MPCC) President Pu Lal Thazara pawhin MLA Pu Lalrintluanga Sailo a kal ta mai chuan a thawn thu sawiin ram leh hnam kaihhruainaa mi thahnem ngai a nih thu leh a bial te ngaihsak a nih thu a sawi.

Pu Lalrintluanga Sailo hi ram hruaitu hrang hrang leh pawl hrang hrang ten an ui thu an sawi a, BJP Mizoram chuan Pu Lalrintluanga Sailo, MLA Term hnih lai ni thei leh VC ah pawh Term li lai tling thei, khawtlang rawngbawl-na-a inhmang tak a ni chuan Pa tha leh thil ti tak tak mi a nih zia a tilang an ti a, Mizoramin hetiang MLA, mi tha tak a chan ta mai chu a pawl a, MNF Party leh a chhungte an tawrhpu takzet a ni an ti.

PC Party chuan Ram leh hnam tana thahnemngai taka an rawngbawlpui, Mizoram Legislative Assembly member leh Dampa bialtu ni mek Pu Lalrintluanga Sailo chu an sun tak meuh a ni an ti a, Veteran Legislator, House chhung leh pawn a mi thahnemngai leh inpe zo tak mai ina mi a kalsan thut mai chu Mizoram leh hnam tan channa nasa a ni a, an ti.

<><><>

CHILD LABOUR TEAM

Champhai District Task Force on Child Labour team chuan Champhai District chhunga hmun laili leh hnathawhna hmun hrang hrangah naupang kum 14 hnuai lam sikul kal lova hnathawka chhawr an awm leh awm loh te zawn chhuah beihpui an thlak a, ni 15 chhung an kalpui ang.

Serchhip District Task Force on Child and Adolescent Labour Rescue and Rehabilitation Campaign 2025 pawhin beihpui hi an thlak tan a,

He Task Force-ah hian police te leh sawrkar department hrang hrang official te bakah tlawmngai pawl hruaitute an tel a. Beihpui thlaknaah hian Serchhip Sub Headquarters YMA hruaitute, police te leh Serchhip District Child Protection Officer leh a staff te an tel a, hmun 4 ah inthenin Serchhip khawpui chhung hmun hrang hrang tlawhin dan kalha naupang chhawr luih – child labour a awm leh awm loh an enfiah a ni.

National Commission for Protection of Child Rights (NCPCR) chuan Pan India Rescue and Rehabilitation Campaign 3.0 - 'A step to eradicate Child Labour' a puang a, naupang kum 14 hnuai lam sikul kal lova hnathawka chhawr an awm leh awm loh te zawn chhuah beihpui thlak tur a ni a, June ni 12 atanga August ni 31 chhungin beihpui hi thlak tur a ni.

<><><>

EMRS MEETING

Nimin khan Chief Minister Office Conference Hall-ah Eklavya Model Residential School thuneitu Mizoram EMRS Governing Council chu an chairman Pu Lalduhoma, Chief Minister hovin an thukhawm a. Hei hi Planning Department hnuaia Tribal Affairs dah a nih hnua Governing Council thutkhawm hmasa ber a ni.

He meetingah hian Mizorama EMRS School awm mek te tihhmasawna tur te chipchiar deuh takin an sawi a. Zirlai naupang tam zawk an luh theih dan tur te, thawktuah Mizo thalai tam zawk an luh theih dan tur te, sak belh leh tur Central sawrkarin a lo phalsak tawh bawhzui dan te chipchiar takin an sawiho.

Tunah hian Mizoramah EMRS hi 11 a awm mek a, 6 sak thar tur a la awm bawk a. Chung zinga palite DPR hi central-ah thehluh tawh a ni. School tinah hian zirlai naupang 480 zel awm thei tura ruahman niin Class 6 atanga class 12 thleng zir theihna school an ni a, zirlai naupangten engkim a thlawn vekin an dawng a. Thawktute zawng zawng hlauh pawh hi central sawrkar tum vek a ni.

<><><>

LAWNGTLAI

Mizorama Upaber ni a rin Pi Famiangi Kum 117, Pangkhua chu nimin khan a thi. Kan corr sawi danin, Pi Famiangi hi taksa chaklohna in a tlakbuak ve zeuh zeuh a, tunthla hian a chaklo zual deuh a, theihtawp chhuaha enkawl a nih hnu ah, nimin zinglam dar 7 khan a chenna In ah a thi a ni. Pi Famiangi hi Lairam Isua Krista Baptist Kohhran ah nimin chawhnu dar 2 khan vuiin, Pangkhua Thlanmual ah phum a ni.

Kan corr report lo ngaithla ang.

Pi Famiangi Kum 117, Pangkhua, Lawngtlai District hi khawtlang hruaituten an chhinchhiahdan chuan Kum 1908 a piang niin, Pu Huathmung leh Pi Suisung te fa niin, Pu Heinawna (L) nen inneiin fa pariat an nei.

Pi Famiangi hi Khupthum hmuin a dam a, Tu 195 neiin, Tu chhuan khatna 51 neiin, Tuchhuan hnihna 122, Tuchhuan thumna 22 a nei.

Pi Famiangi hian Pathian malsawmna a dawng nasain, kum upa tak a nih thlengin a hriselna a tha viau tih khawtlang hruaitute chuan an sawi a, Kum 2024 Assembly Election ah pawh Vote la thlakin, Election thuneitu lamten chawimawina an hlan nghe nghe a ni.

<><><>

WAI WAI

Mizoram chu a mi cheng zat anga chhuta ramchhunga Kamram hriat hlawh tak, Wai Wai ei nasa state pathumna a ni.

Wai Wai siamtu Chaudhary Group hnuai CG Foods managing director Varun Chaudhary chuan he thu hi sawiin an thil siam ei nasa Mizoram mipui chungah lawmthu an sawi a. Inkalpawhna kawng a that a, power supply hnianghnar a awm ve leh ngelnghet zawkarawn inbun dan an dap dawn tih a sawi.

Zawhna chhangin Varun Chaudhary chuan heti taka an thil siam an ngaihhlut avang hian Mizoram tan pek let ve tur an la dap dawn a, rel kawng a tlang that a, power supply hnianghnar a awm hunah liantham zawkarawn inbun an duh tih a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

BIHAR

Bihar-a Special Intensive Revision (SIR) neih mekah voter vaibelchhe sarih leh nuai 68 chuang tuam chhuah tawh an nih thu Election Commission chuan a sawi. EX chuan voter nuai 18 sing 6 leh sang 6 chu an thi tawh tih sawiin nuai 26 chuang chu hmundangah an insawn tawh a. Voter nuai 52 leh sing 3 chu an address ziahah hmuh tur an awm lo a ti bawk. Commission chuan thla leh ni 1 a tihchhuah tur Draft electoral roll ah vote nei zawng zawng an lan kim vek theih nan theihtawp chhuah a nih thu a sawi bawk.

<><><>

PM

Prime Minister Narendra Modia chuan UK leh Maldives tlawh turin vawiinah a zinchhuak dawn. Pu Modia hian United Kingdom ah hian ni hnih a cham dawn a. Foreign Secretary Vikram Misri sawidanin Pu Modia hian British PM Keir Starmer leh King CHARLES III te a kawm dawn a. India- UK Strategic Partnership chungchangte sawiho a ni bawk ang. A thawh hnihnaah Pu Modia hian Maldives a pan leh ang a. Maldives Independence Day vawi 60-na an hman turah khuallian niin a hmanpui dawn a ni.

<><><>